



Rede Defensor Direitos Umanus (RDDU)
Rua Karketu Mota-ain Nù. 08, Farol, Dili Timor-Leste

KOMUNIKADU IMPRENSA **Maiu 2017**

In-serteza justisa sei fo impaktu negativu ba Estadu Direitu no Demokratiku

Rede Defensor Direitos Umanus (RDDU), ne'ebé kompostu hosi organizasaun sosiedade sivil lubuk ida ne'ebé serbisu iha area direitus umanus, husu ba instuitisaun hotu-hotu atu hala'o nia kna'ar ho profisional hodi tane aas no promove prinsipi no valor direitus umanus. RDDU ezije ba Estadu -liu-liu forsa seguransa no Ministériu Públiku loke kedas investigasaun ba alegasaun violasaun direitus umanus hosi forsa seguransa, remata investigasaun iha tempu badak no foti asaun tuir lei. Kazu violasaun direitus umanus, liu-liu kazu ne'ebé hamate ka hakanek ema, sai preokupasaun ba RDDU no, ami fiar, mós ba públiku. Nune'e, RDDU husu ba Estadu nia instituisaun relevante hodi fó informasaun ba públiku kona-ba rezultadu investigasaun no asaun ne'ebé foti kuandu konklui katak violasaun mosu duni.

Asaun kriminál no dixiplinariu lalais ba sira ne'ebé halo asaun kontra lei bele lori justisa ba vítima no família, no mós bele prevene violasaun foun mosu. RDDU observa katak dala barak, hafoin kazu mosu, entidade Estadu, inklui komandante forsa seguransa, halo deklarasaun publika katak sei halo investigasaun no la tolera krime hosi membru rasik. Maibé ikus liu, prosesu justisa la'o neineik, ka la iha informasaun kona-ba asaun ne'ebé foti hasoru membru ne'ebé halo violasaun. Inseteza justisa bele hamosu kazu foun, hanesan alegasaun tortura iha Maliana hosi membru PNTL balu ba ema sivil ida iha estádiu joga bola Malibaka, Maliana iha 22 Abril.

RDDU mós preokupa kona-ba kazu foun seluk, iha Bebonuc iha 6 Maiu - maske ami rekoñese katak distúrbiu ruma akontese beibeik ona iha Bebonuc ho impaktu negativu ba populasaun ne'ebé hakarak moris hakmatek iha ne'ebé no rekere suporta hosi PNTL hosi mantein seguransa iha area ne'ebá. RDDU ezije investigasaun lalais ba kazu ne'e liu-liu tanba ema lakon nia direitus fundamental liu, tanba hetan tiru to'o mate.

Ba alegasaun violasaun direitus umanus balu ne'ebé akontese hosi 2014-2016, RDDU husu ona informasaun hosi Prokurador Jerál kona-ba progresu ba prosesu justisa; kazu ne'ebé akontese durante operasaun conjunta (2014-2015), kazu polisia tiru joven iha Liquica, tiru membru F-FDTL iha Ainaro, no kazu oho ema ho defisiénsia mental iha Cova Lima (2016). RDDU haruka karta ba PGR iha 2 Dezembru 2016 kona-ba kazu sira ne'e, maibe seidak hetan resposta. RDDU rekoñese katak Ministériu Públiku iha prioridade barak, maibé vítima, família no mós públiku iha direitu atu hetan informasaun kona-ba prosesu investigasaun bazeia ba artigu 40 Konstituisaun da República kona-ba direitu atu hetan informasaun no mós Dekretu Lei Nú. 32/2008 kona-ba Prosedimentu Administrativu, artigu 20 (*Direito dos interessados à informação*).

Agora, Timor-Leste tama ona fase eleisaun Parlamentár, ne'ebé ema hotu espera katak sei la'o ho pas. Justisa mak importante atu garante pas. Ho nune'e, RDDU husu:

- 1) Ba instituisaun hotu-hotu, liu-liu PNTL, atu hala'o nia kna'ar ho profisional hodi tane aas no promove prinsipiu no valor direitus umanus. Kuandu uza forsa, sempre tenke tuir lei no proporsional
- 2) Ba Ministeriu Publiku no lideransa forsa seguransa atu halo investigasaun kriminal no dixiplinariu kedas ba alegasaun violasaun direitus umanus hosi membru sira, remata investigasaun iha tempu badak, foti asaun kedas tuir lei, no fo informasaun ba publiku.

Obrigadu wain ba Ita-Boot nia atensaun.

Dili, 19 Maiu 2017

Koordenadór RDDU

(Jose Maria Moniz)

Membru Rede Defensór Direitus Umanus:

1. Asosiasaun HAK
2. Asosiasaun Chega! Ba Ita (ACBit)
3. Asisténsia Legal Feto no Labarik (ALFeLA)
4. Asia Justice and Rights (AJAR)
5. Asosiasaun Halibur Defisiénsia Matan Timor-Leste (AHDMTL)
6. Belun
7. Community Based Rehabilitation (CBR) Network
8. Coalition for Diversity and Action (CODIVA)
9. Fundasaun Mahein (FM)
10. The Judicial System Monitoring Program (JSMP)
11. La'o Hamutuk